



ქალაქ თბილისის მუნიციპალიტეტის საკრებულო



ბ ა ნ კ ა რ ბ უ ლ ე ბ ა № _86_

“ 29 ” მარტი 2024 წ

ქ. თბილისი

საქართველოს ადმინისტრაციულ სამართალდარღვევათა კოდექსის 130-ე მუხლის მე-4 ნაწილის „ა“ ქვეპუნქტით შედგენილ ელექტრონულ საჯარიმო ქვითრებზე განხორციელებულ გადახდებზე გასატარებელი რიგი ღონისძიების შესახებ

ქალაქ თბილისის მუნიციპალიტეტის საჯარო სამართლის იურიდიული პირის – ქალაქ თბილისის მუნიციპალიტეტის ტრანსპორტისა და ურბანული განვითარების სააგენტოსთვის შესაბამისი ნორმატიული აქტებით მინიჭებული უფლებამოსილების ფარგლებში, კერძოდ საქართველოს ადმინისტრაციულ სამართალდარღვევათა კოდექსის 130-ე მუხლის მე-4 ნაწილის „ა“ ქვეპუნქტით გათვალისწინებული სამართალდარღვევებისათვის შედგენილი ელექტრონული საჯარიმო ქვითრებით განსაზღვრული ჯარიმების თანხებისა და დარიცხული საურავების თანხების გადახდის კონტროლის საქმეში ბოლო პერიოდში დაფიქსირდა შემთხვევები, როდესაც ადმინისტრაციული სამართალდარღვევის ჩადენისთვის დაკისრებული თანხა ან/და საურავი საბანკო დაწესებულების ან ელექტრონული გადახდის საშუალების მეშვეობით გადახდილია ისე, რომ მითითებული არ არის ელექტრონული საჯარიმო ქვითრის ნომერი, თუმცა სწორად არის მითითებული სახაზინო კოდის ნომერი და სამართალდამრღვევის მონაცემები (სახელი, გვარი, პირადი ნომერი). იმის გათვალისწინებით, რომ გადახდისას არ იყო მითითებული ელექტრონული საჯარიმო ქვითრების ნომრები, ვერ აისახა გადახდები და ადმინისტრაციული სამართალდამრღვევების საქმეებზე გამოიცა საურავის დარიცხვის შესახებ დადგენილებები, ხოლო საქმეები აღსასრულებლად გადაგზავნილია საქართველოს იუსტიციის სამინისტროს მმართველობის სფეროში შემავალ საჯარო სამართლის იურიდიულ პირ აღსრულების ეროვნულ ბიუროში. მიმდინარე დროისათვის ქალაქ თბილისის მუნიციპალიტეტის საჯარო სამართლის იურიდიულ პირ – ქალაქ თბილისის მუნიციპალიტეტის ტრანსპორტისა და ურბანული განვითარების სააგენტოში ფიქსირდება მოქალაქეთა მსგავსი შინაარსის ასეულობით წერილი. მოქალაქეთა ინტერესების გათვალისწინებით ქალაქ თბილისის მუნიციპალიტეტის მერიის, საქართველოს იუსტიციის სამინისტროს, საჯარო სამართლის იურიდიულ პირ აღსრულების ეროვნულ ბიუროს, საჯარო სამართლის იურიდიულ პირ საქართველოს ოპერატიულ - ტექნიკურ სააგენტოს, ქალაქ თბილისის მუნიციპალიტეტის საჯარო სამართლის იურიდიულ პირ – ქალაქ თბილისის მუნიციპალიტეტის ტრანსპორტისა და ურბანული განვითარების სააგენტოს და ქალაქ თბილისის მუნიციპალიტეტის მერიის საფინანსო საქალაქო სამსახურს შორის შედგა არაერთი კომუნიკაცია ზემოაღნიშნული საკითხის მოგვარების მიზნით.

საქართველოს ორგანული კანონის - „ადგილობრივი თვითმმართველობის კოდექსი“ 61-ე მუხლის მე-2 პუნქტისა და 75-ე მუხლის „ე.თ“ ქვეპუნქტის, „საქართველოს

ადმინისტრაციულ სამართალდარღვევათა კოდექსის 125-ე მუხლის მე-8 და მე-12-მე-16 ნაწილებით, 125² მუხლით, 130-ე მუხლის მე-4 ნაწილის „ა“ ქვეპუნქტით, 134¹ მუხლით, 135-ე-135⁵ მუხლებით გათვალისწინებული სამართალდარღვევებისას და საქართველოს ადმინისტრაციულ სამართალდარღვევათა კოდექსის 125-ე მუხლის მე-8, მე-12-მე-13 და მე-15 ნაწილებით, 125² მუხლით, 135-ე-135⁵ მუხლებით გათვალისწინებული ადმინისტრაციული სამართალდარღვევების ფაქტების ვიდეოფირზე ან/და ფოტოფირზე დაფიქსირების შემთხვევაში, საქართველოს კანონმდებლობით დადგენილი წესით საჯარიმო ქვითრის - ადმინისტრაციული სამართალდარღვევის ოქმის ფორმის, მისი შედგენის/გამოწერის, ჩაბარების, აღრიცხვა-ანგარიშგებისა და გასაჩივრების წესის დამტკიცების შესახებ“ ქალაქ თბილისის მუნიციპალიტეტის საკრებულოს 2020 წლის 15 მაისის №57-52 დადგენილების საფუძველზე და საქართველოს ადმინისტრაციულ სამართალდარღვევათა კოდექსის 130-ე მუხლის მე-4 ნაწილის „ა“ ქვეპუნქტით გათვალისწინებული სამართალდარღვევებისათვის სახდელდადებულ პირთა ინტერესების გათვალისწინებით, ქალაქ თბილისის მუნიციპალიტეტის საკრებულო ადგენს:

1. პირებს, რომელთა მიმართაც 2023 წლის პირველი ივლისიდან ამ განკარგულების გამოცემამდე შედგენილია ელექტრონული საჯარიმო ქვითრები საქართველოს ადმინისტრაციულ სამართალდარღვევათა კოდექსის 130-ე მუხლის მე-4 ნაწილის „ა“ ქვეპუნქტით გათვალისწინებული სამართალდარღვევების ჩადენისათვის და ამ ელექტრონული საჯარიმო ქვითრით განსაზღვრული ჯარიმა ან/და ჯარიმის გადაუხდელობის გამო დარიცხული საურავი გადახდილი აქვთ კანონმდებლობით დადგენილ ვადაში კანონმდებლობით გათვალისწინებულ შესაბამის სახაზინო კოდზე (300773255), ამასთან, ფიქსირდება სამართალდამრღვევის მონაცემები (სახელი, გვარი და პირადი ნომერი), თუმცა არ აქვთ მითითებული ელექტრონული საჯარიმო ქვითრის ნომერი, ჩათვალთ გადახდილად და მათ მიმართ აღარ განხორციელდეს/აღარ გაგრძელდეს გადახდის უზრუნველყოფის ღონისძიებები.


2. ქალაქ თბილისის მუნიციპალიტეტის საჯარო სამართლის იურიდიულ პირს – ქალაქ თბილისის მუნიციპალიტეტის ტრანსპორტისა და ურბანული განვითარების სააგენტოს დაევალოს:

ა) ამ განკარგულების პირველი პუნქტით გათვალისწინებული გადახდების ჩათვლისათვის საჭირო ღონისძიებების განხორციელება;

ბ) ამ განკარგულების პირველი პუნქტის შესაბამისად ადმინისტრაციულ სამართალდარღვევათა საქმეებზე გადახდილი თანხების ჩათვლა გაითვალისწინოს გასაჩივრებული საქმეების განხილვისას.

3. ამ განკარგულების გასაჩივრება, დაინტერესებული მხარის მიერ, შესაძლებელია მისთვის განკარგულების გაცნობიდან ერთი თვის ვადაში, თბილისის საქალაქო სასამართლოში (მისამართი: ქ. თბილისი, დავით აღმაშენებლის ხეივანი №64), საქართველოს კანონმდებლობით დადგენილი წესით.

ქალაქ თბილისის მუნიციპალიტეტის
საკრებულოს თავმჯდომარე



გიორგი ტყემალაძე